



Broj: 0101-~~5155~~-825.

Sarajevo, 14. 05. 2025. godine

Na osnovu člana 154. stav (1) Zakona o visokom obrazovanju („Službene novine Kantona Sarajevo“, broj: 36/22), te člana 102. Statuta Univerziteta u Sarajevu, broj: 01-14-35-1/23 od 26. 07. 2023. godine, kao i člana 3. Poslovnika o radu Etičkog savjeta Univerziteta u Sarajevu, broj: 01-4-137-1/24 od 30. 10. 2024. godine, Etički savjet Univerziteta u Sarajevu je na 10. redovnoj sjednici održanoj 14. 05. 2025. godine, sa (7) glasova „za“ daje s l j e d e ć e

## PREPORUKE

### Član 1.

(Predmet)

Etički savjet Univerziteta u Sarajevu (u daljem tekstu: **Etički savjet**) ima nadležnost da postupa kao drugostepeni organ, odnosno da razmatra žalbe na odluke etičkih odbora članica Univerziteta (u daljem tekstu: **Etički odbor**), stoga u cilju detaljnijeg reguliranja načina postupanja i davanja upute za postupanje prvostepenom organu u slučaju zaprimanja žalbe od strane zainteresiranog lica, daje sljedeće preporuke za postupanje odborima članica i drugim subjektima koji postupaju po proceduri utvrđenoj Etičkim kodeksom Univerziteta u Sarajevu (u daljem tekstu: **Etički kodeks**).

### Član 2.

(Zainteresirana strana i zahtjev za davanje mišljenja)

- (1) Postupak se pokreće podnošenjem zahtjeva zainteresirane strane (inicijator) na propisanom obrascu za davanje mišljenja o usklađenosti određenog djelovanja ili ponašanja s načelima i pravilima Etičkog kodeksa. Obrazac Zahtjeva će biti dostupan na stranici Univerziteta u Sarajevu i članica Univerziteta.
- (2) Zahtjev se podnosi u pisanoj formi putem protokola članice Univerziteta, te isti obavezno mora biti potpisan (uz prateću dokumentaciju propisanu članom 3. ovih Preporuka).
- (3) Zaprimljeni zahtjev u daljoj proceduri predsjedniku etičkog odbora članice podnosi dekan članice, prema vlastitoj inicijativi ili na prijedlog drugih tijela ili članova univerzitetske zajednice (postupak pokreće).
- (4) Ukoliko se zahtjev odnosi na dekana, inicijator se obraća vijeću članice koje većinom glasova odlučuje da li će pokrenuti postupak pred etičkim odborom članice.
- (5) Ukoliko po zahtjevu inicijatora dekan/vijeće ne podnese zahtjev etičkom odboru članice u roku od 30 dana, inicijator može sam podnijeti zahtjev etičkom savjetu, koji je u tom slučaju nadležan i on može pokrenuti sam postupak kod etičkog odbora članice.

### Član 3.

(Zahtjev)

Zahtjev zainteresirane strane (inicijator) za davanje mišljenja o usklađenosti određenog djelovanja ili ponašanja s načelima i pravilima Etičkog kodeksa, treba da sadrži elemente propisane Etičkim kodeksom, a to su:

- a) Načelno (predmetno) pitanje o kojem je riječ;
- b) Konkretni okolnosti slučaja i djelovanje odnosno ponašanje za koje se traži mišljenje (opisati detaljno);
- c) Uz zahtjev se prilažu i relevantni dokazi, materijal koji se vezuje za predmetno pitanje, te
- d) Navodi o odredbama Etičkog kodeksa u vezi sa kojima se traži mišljenje.

### Član 4.

(Postupak koji se vodi pred prvostepenim organom – etičkim odborom članice Univerziteta)

- (1) Vezano za zahtjev iz prethodnog člana, predsjednik etičkog odbora članice je obavezan sazvati sastanak odbora u roku od 30 dana od dana primitka zahtjeva.

- (2) Etički odbor može od podnosioca zahtjeva zatražiti dodatna pojašnjenja od zainteresirane strane i dopunu zahtjeva. Ukoliko se zahtjevom traži ispitivanje etičnosti ponašanja određenog člana akademske zajednice, tom se članu mora omogućiti da se pismenim putem izjasni o navodima i iznese svoju argumentaciju.
- (3) Etički odbor odlučuje isključivo na temelju navoda i podataka iz zahtjeva, priloga uz zahtjev i dodatnih pojašnjenja i očitovanja podnosioca zahtjeva i drugih osoba vezanih za predmetno pitanje.
- (4) Nakon odlučivanja odluka se dostavlja stranama u postupku i Etičkom savjetu.
- (5) Etički odbor odluke donosi konsenzusom svih članova etičkog odbora, ako je to moguće. Ako nije moguće, na osnovu većine glasova prisutnih članova etičkog odbora.
- (6) Prilikom odlučivanja o zahtjevu zainteresirane strane (inicijator) za davanje mišljenja o usklađenosti određenog djelovanja ili ponašanja s načelima i pravilima Etičkog kodeksa etički odbor donosi isključivo akt u formi odluke.
- (7) Odluka iz prethodnog stava obavezno sadrži sljedeće elemente:
  - a) Opis zahtjeva i pitanja o kojima je odbor raspravljao;
  - b) Navode o načelima i pravilima Etičkog kodeksa koje je u povodu zahtjeva odbor uzeo u obzir i razmatranje;
  - c) Stajalište odbora o tome je li ponašanje opisano u zahtjevu u skladu sa Etičkim kodeksom ili ne;
  - d) Razloge za donošenje odluke (u formi u kojoj se donosi);
  - e) Podatak o tome da li je mišljenje doneseno jednoglasno ili ne.
- (8) Odluke kojima se utvrđuje da su određena ponašanja/djelovanja protivna načelima i pravilima Etičkog kodeksa, može sadržavati i sljedeće elemente:
  - a) Ocjenu odbora o nivou neusklađenosti i težini povrede etičkih načela;
  - b) Stajalište odbora o načinima na koji se mogao izbjeći nesklad sa pravilima i načelima Etičkog kodeksa i o mjerama koje bi se trebale poduzeti;
  - c) Mišljenje koje nije doneseno jednoglasno, mora sadržavati i izdvojeno mišljenje članova koji su bili protiv.
- (9) Odluka se obavezno dostavlja i zainteresiranoj stranici (inicijatoru), u što kraćem roku.
- (10) Obavezni sadržaj svakog prvostepenog akta je pouka o pravnom lijeku kojom se zainteresirana strana obavještava da protiv mišljenja/odluke može podnijeti žalbu drugostepenom organu – Etičkom savjetu.
- (11) Sva pitanja koja nisu obuhvaćena preporukama, a uređena su drugim propisima, direktno se primjenjuje propis.

#### Član 5.

*(Postupak koji se vodi pred drugostepenim organom - Etičkim savjetom)*

- (1) Žalba na odluke etičkih odbora članica se podnosi na propisanom obrascu. Obrazac Žalbe će biti dostupan na stranici Univerziteta u Sarajevu.
- (2) Žalba se neposredno predaje ili šalje poštom organu koji je donio prvostepenu odluku.
- (3) Ako je žalba predata ili putem pošte poslata neposredno drugostepenom organu (Etičkom savjetu), ista se prethodno (vraća) šalje organu prvog stepena (etičkom odboru članice).
- (4) Uz žalbu prvostepeni organ dužan je priložiti sve dokaze priložene uz zahtjev, te svoje izjašnjenje na navode žalbe.
- (5) U slučaju da neka pitanja nisu riješena internim propisima u vezi sa obavezama u postupanju prvostepenog i drugostepenog organa, direktno se primjenjuju odredbe Zakona o upravnom postupku Federacije Bosne i Hercegovine.

#### Član 6.

*(Stupanje na snagu)*

Ove Preporuke stupaju na snagu danom donošenja i primjenjuje se od strane odbora članica Univerziteta, kao i od strane Etičkog savjeta kod drugostepenih postupaka.

#### Dostaviti:

- Predsjednicima etičkih odbora,
- Sekretarima članica,
- Web stranica Univerziteta (u dijelu Etički savjet),
- A/a.

